



Sabtu, 24 April 2021

Ogen: Keluaren 1:15-22



Erkemalangen man Tuhan



Erkemalangen i bas kata malang, ertina hormat, mehamat, patuh, sopan. Erkemalangen man Dibata ertina lit biak patuh i bas ndalanken kata Dibata. I bas kepatuhen e me bukti mehamat entah hormat. Jadi mehamat entah hormat e eme perbahanen, labo kata-kata. Sopan e teridah arah sikap ngerana ras perbahanen.

Siprah ras Puah eme bidan-bidan i Mesir. Dua kalak bidan e isuruh raja nampati diberu-diberu kalak Heber si atena mupus. Janah nina Raja Mesir, adi tubuh anak kalak Heber e dilaki minter bunuh tapi adi diberu pelepas nggeluh. Bidan enda duana mbiar man Dibata, la akapna payo printah raja enda. Si dua kalak enda milih patuh man Dibata labo man raja. Kepatuhenna ituduhkenna arah nampati diberu kalak Heber mupus ras mpekena-kena anak si tubuh subuk dilaki entah diberu. Ipediatna kerina nggeluh sebab anak e pemere Dibata. Labo lit hak manusia mbeneken kesahna. Tupung idilo raja bidan enda duana, ras nungkun kerna perbahanenna e, alu sopan ia mereken jababna man raja, nina ; diberu kalak Heber murah kal akapna mupus, ope denga kami seh irumahna, anak e enggo tubuh. Teridah biak si erkemalangen man Tuhan i bas bidan enda duana, kata-kata ras perbahanenna la sada pe encedai pusuh. Ulihna, ibereken Dibata man bana duana kesempatan manteki jabu si mbaru. Karakter bidan enda ndai min jadi karakter kerina moria, i bas teptep pendahin pang ras patuh ngelakoken kata Dibata, subuk bas kantor, i rumah sakit, i tiga, i juma, i sekolah ras ingan-ingan si deban. Amin mbelin tantangan subuk bas jabu bagepe bas sekelewet nari. Biaren min kita man Dibata asangkan man pemimpin doni enda. Dibata erngena ate man kalak si patuh man baNa.

Kata Dibata engkuasai perukuren, pengerana ras pendahin

